

NEWSLETTER

February

2019



FONDACIJA  
HASTOR



## FONDACIJA HASTOR: MJESTO USPJEHA I ZAJEDNIŠTVA

U subotu, 9. februara, sjedište ASA Prevent grupacije u Sarajevu bilo je mjesto okupljanja najvećeg broja studenata stipendista iz svih dijelova Bosne i Hercegovine. Neki stipendisti su svoj put započeli u 4 sata ujutro, a sve kako bi na vrijeme stigli u sjedište Fondacije Hastor i kako bi taj dan iskoristili na pravi način: stekli nove vještine i znanja, razmijenili različita iskustva s ljudima istoga interesovanja i osjetili čari zajedništva kojih u ovoj organizaciji ne manjka. Na samome početku prisutne je pozdravio učitelj Ramo koji je u nastavku sastanka održao izlaganje iz oblasti kojom se bavi cijelog svoga života, a to je pedagogija, odgoj i obrazovanje. Bilo je tu riječi o mnoštvu pedagoških i odgojnih mudrosti, ali i univerzalnih ljudskih vrijednosti o kojima su prisutni imali priliku slušati od eminentnog izlagачa iz ove oblasti. Prisutni stipendisti su se javljali za komentar i tako upotpunili predavanje iznoseći svoje stavove i osrt na temu o kojoj je bila riječ.

Razim Medinić



## STIPENDISTA AJDIN BAJRIĆ SA SAMO 17 GODINA PREDSTAVLJA SVOJU PRVU APLIKACIJU

*Zovem se Ajdin Bajrić i imam 17 godina. Pohađam treći razred Elektrotehničke škole u Tuzli. Treniram odbojku, a u slobodno vrijeme volim igrati šah i rješavati probleme, pa sam tako sa svojim prijateljima došao na ideju da riješimo problem koji je zastupljen u našem društvu i odlučili smo da se prijavimo na Start Me Up takmičenje, kako bismo našu ideju sproveli u djelo.*

Start Me Up: High School takmičenje održalo se od 18. do 20. januara 2019. godine. Zajedno sa svojim kolegama Ajdin se prijavljuje na takmičenje sa Start-Up idejom "Arc".

### ŠTA JE TO USTVARI „ARC“ I KAKO FUNKCIIONIŠE?

Arc predstavlja platformu/aplikaciju koja omogućava lakšu organizaciju prijevoza i zarade. Ustvari je vrlo jednostavno. Korisnik, odnosno neko u potrebi za prijevozom (brzim i ekonomičnim), otvoriti aplikaciju i potraži vozilo i vozača prikladno sopstvenim standardima. Na aplikaciji se pojave lokacije svih vozača koji se nalaze u blizini, zajedno sa njegovim recenzijama od drugih korisnika, ličnim podacima i podacima o njegovom vozilu. Odlučujući da je taj vozač upravo za njega, korisnik šalje svoju lokaciju kojom sebe otkriva tom vozaču i dozvoljava istome da

dođe do njega. Prilikom dolaska vozača, sjedanjem u vozilo, potvrđuje se dolazak i novac se, putem kartice (odnosno e-banking sistema) šalje s računa korisnika na račun vozača.

Platforma omogućava svakom građaninu, odnosno korisniku, brz pronašetak prijevoza u bilo koje vrijeme, na bilo kojem mjestu. Ekonomično je za obje strane, kako vozače, tako i za korisnike.

### PITATE SE KAKO?

Vozači neće imati nikakve dnevne naknade za izvršavanje ove djelatnosti niti će imati potrebe za dodatne licence i slično.

Na ovu ideju smo došli nakon nekolicine diskusija i sagledavanja stanja u mnogim sferama života u našoj državi, i odlučili da je ova ideja inovativna, ekonomična i profitabilna. Moguće je korištenje za sve građane, studente, penzionere, ustvari, bilo koga ko ima pristup vozilu, vozačkoj dozvoli i kartičnom plaćanju.

Rad i trud se pokazao uspješnim te su Ajdin i ekipa osvojili drugo mjesto. Aplikacija je u izradi i svjetlo dana bi trebala ugledati 15. aprila 2019. godine.

Razim Medinić





# MIDHAT AGANOVIĆ MLADI BOKSER I DIZAJNER

*Želja za uspjehom je učinila od mene osobu koja spava 6 sati dnevno, a veliki dio svog vremena posvećujem čitanju knjiga.*

”

Midhat Aganović je učenik drugog razreda Prve gimnazije u Zenici, a stipendista Fondacije Hastor je već šest godina. Midhat značajan dio svog vremena posvećuje vannastavnim aktivnostima koje su predmetom njegovog interesovanja i fokusa. Midhat ističe kako je veoma sretan i ponosan na činjenicu da Fondacija Hastor zna da prepozna, cijeni i na taj način podstakne svaki njegov progresivni korak u onome što zna i voli da radi.

Midhat se već duži period bavi boksom, izučavanjem arapskog i turskog jezika, a trenutno je dizajniranje logo oznaka u fokusu njegovog interesovanja i izučavanja. Boks trenira već dugi niz godina, te je u tom sportu ostvario značajne rezultate. U svojoj dosadašnjoj karijeri imao je desetak mečeva. Njegov najznačajniji uspjeh u sferi bavljenja ovim sportom, a samim tim i njegov najdraži meč, dogodio se u novembru 2018. godine kada je na takmičenju u Žepču pobijedio hrvatskog državnog prvaka. Prethodno je iz svakog takmičenja na kojem je učestvovao izašao kao pobjednik meča, a njegov posljednji i jedini meč na kojem je izgubio održan je 23. decembra u Tuzli.

Midhat trenutno dizajnira logo oznake za pojedine kompanije iz inostranstva. Ističe da se dizajniranjem počeo baviti u septembru prošle godine, nakon razgovora s rođakom, koji je, također, dizajner, te koji ga je uputio u osnove ovog posla. S njim je počeo kontinuirano učiti, te je nakon izvjesnog vremena shvatio koliko brzo napreduje. Uporedo s njegovim učenjem i napretkom razvijala se i ljubav prema dizajnu. Midhat naglašava kako je dodatni benefit ovog posla mogućnost samostalnog rada i rada od kuće, a posao je pri tome cijenjen i dobro plaćen. Izučavanje dizajna probudilo je njegovu kreativnost, kao i želju za crtanjem, ali i privrženost dizajnu kao poslu i na produktivan način iskorištenom

vremenu. Trenutno mu je elementarni cilj da nauči da bude istrajan svom radu, da proširi svoje znanje iz domena dizajna, a dizajniranje logo oznaka za kompanije iz inostranstva prevashodno vidi kao vježbu kolaboracije, praksu i efektivan način učenja i usavršavanja.

Valja naglasiti i da Midhat stanuje u internatu gdje uči arapski jezik, što je u mnogome u koleraciji s dizajniranjem budući da je značajan broj njegovih klijenata upravo iz Katara. Pored arapskog, uči i turski jezik.

Kroz ovih šest godina, koliko sam stipendista Fondacije Hastor, shvatio sam da se možda većina dobrih stvari ne bi desila ili da bi to bilo puno teže. Fondacija mi je omogućila da idem na određene kurseve, da priuštim neke stvari i općenito mi je mnogo pomogla u životu.

Njegove mentorice su studentice stipendistkinje Fondacije Berina Golub i Nirmela Komarac koje su imale priliku da Midhata malo bolje upoznaju kroz mjesečna volonterska druženja stipendista. Berina dolazi iz mjesta Gornja Višnjica i prva je godina studija na Odsjeku za bosanski, hrvatski i srpski jezik i književnost Univerziteta u Zenici, a Midhata opisuje na sljedeći način: Za Midhata mogu reći da je prilično aktivan na našim sastancima. Na prvi pogled, čini se malo povučen i tih, međutim, kad krenemo razgovarati o nečemu, vrlo rado iznosi svoja mišljenja i određene stavove. Iako ne pokazuje dobre rezultate u školi, njegove druge aktivnosti poput boksa, dizajniranja logo oznaka, kurseva stranih jezika, kao što su turski i arapski, bitno doprinose razvoju njegove ličnosti i postizanju novih uspjeha. Vjerujem da će se poboljšati i u školi kako bi u svim aspektima bio na najboljem nivou.

Njena kolegica Nirmela Komarac, također Midhatova mentorica, je iz mjesta Kaonik, a trenutno je na prvoj godini studija Ekonomskog fakulteta Univerziteta u Zenici na odsjeku Menadžment. Sličnog je mišljenja kao i Berina kada je u pitanju Midhat i njegov angažman, kako na sastancima, tako i u prethodno navedenim aktivnostima kojima se dominantno bavi. Nirmela ističe sljedeće: Jako je komunikativan sa svojom grupom i vrlo dobro se slažu. U aktivnostima kojim se bavi je veoma uspješan, a kroz volonterske sate to i pokazuje. Na svakom sastanku ima nešto novo za ispričati o svojim postignućima. Uvijek nas pokušava nasmijati nekom šalom ili zanimljivom pričom. Pored svega, voli da čita knjige.

Midhatove težnje za bližu budućnost usmjerene su prvenstveno ka osnivanju kompanije u okviru koje planira, skupa s još nekoliko kolega koje imaju znanje

srođno njegovom, razviti vlastiti biznis. Naglašava kako nikada nije imao jasnu definiciju onoga čime se u budućnosti želi baviti, budući da ga mnogo toga zanima, te da ima težnju za obuhvatanjem različitih oblasti života i rada. Midhat sebe smatra veoma sporadičnom osobom. No, ono u šta je potpuno siguran jeste da je njegov dugoročni cilj biti najbolji u svemu što radi i što će u budućnosti raditi. Želja za uspjehom je učinila od mene osobu koja spava 6 sati dnevno, a veliki dio svog vremena posvećujem čitanju knjiga, ističe Midhat. Uzveši u obzir da je početna tačka svakog uspjeha zapravo želja, sigurni smo da je prosperitet i jedna svjetla budućnost ispred svakog onog koji u tu svoju želju uloži kontinuirani napor, permanentni rad, zalaganje i bezuvjetnu posvećenost.

Amina Vatreš





## 6. MALA POČETNA SLOVA

Primjećujemo kako se nekim oficijelnim stranicama upravlja kao s privatnim profilima i obično se ne vodi računa o tome hoće li rečenice započeti velikim ili malim početnim slovom. Takva praksa na službenim stranicama ili profilima, ovisno o kojoj je društvenoj mreži riječ, često odaje dojam neozbiljnosti pa o tome itekako treba voditi računa.

## 8. PRETJERIVANJE S TAČKAMA

Tačke se često koriste kao ukras, no njihova primarna funkcija je označavanje nezavršenosti rečenice te služe kao oznaka nenavedenog ili izostavljenog teksta, pa treba pripaziti i izbjegavati pretjerivanje.



## 7. ODNOŠNI PRIDJEVI

S druge strane, odnosni se pridjevi (na –ski, –ški, –čki, –čki) izvedeni od vlastitih imena često pišu velikim slovom, a ispravno ih je pisati malim slovima (npr. istarski, bosanski, travnički).

## UČITELJEV KUTAK



Drage moji studentice i studenti,

danas ću vam govoriti o čovjeku, o čovjeku u pravom smislu te riječi. Čovjek je čovjek vuk, i čovjek; kako to gordo zvuči.

U svakom čovjeku egzistiraju, kako najniži nagoni koji ga vuku u ponor, tako i plemenita svojstva koja ga izdižu i vuku naprijed.

Da bi neko bio čovjek, mora poštovati i uvažavati druge ljudе, treba odbaciti srdžbu iz svog ponašanja, eliminisati zavist iz svog srca, odagnati od sebe strast za naređivanjem. Treba se suzdržati od svađa, odagnati od sebe škrtost, treba se opredijeliti za skromnost na račun rasipništva, treba udovoljavati opravdanim potrebama ljudi.

Mora se baviti naukom kako bi bio mudar i nikog ne pominjati osim po dobru. Da bi bio plemenit, mora savladati sve elemente požude.

U svakom poslu recept za uspjeh je rad, red i upornost i što je posebno važno: ljubav, iskrenost i povjerenje prema sagovornicima. Svoje znanje mora stalno uvećavati i djeliti ga sa drugim ljudima. Da bi uspješno dijelio znanje, mora poznavati i pridržavati se nekih pravila iz pedagoške prakse kao što su:

- 1. Poštuj osjećanja sagovornika.**
- 2. Ne stvaraj situaciju u kojoj će se sagovornik osjećati odbačeno.**
- 3. Nikad ne iznosi u uvredljivoj formi slabosti jednog sagovornika u prisustvu drugih.**
- 4. Podstiči sagovornike kad god je to moguće, posokoli ih da bolje rade.**
- 5. Učini sve da tvoje procjene i ocjene budu maksimalno objektivne, uvijek ih primi s rezervom i preispitaj.**
- 6. Ne stvaraj konfliktne situacije koje remete međuljudske odnose.**
- 7. Sa ljudima uspostavi korekstan i ljudski, topao odnos.**

## SAVJETI IZ PRAKSE

- 8. Autoritet gradi na kvalitetima vlastite ličnosti, a ne na strahu.**
- 9. Znanjem, iskustvom i odgovornošću gradi povjerenje onih kojima treba da pružiš pomoć.**
- 10. U procesu verbalne komunikacije sa sagovornicima vodi računa da govorиш polako, biranim riječima, riječima iz kojih će zračiti poštovanje sagovornika.**
- 11. Ne dozvoli sebi da se svađaš sa sagovornicima.**
- 12. Ako se pojavi problem u ponašanju pojedinaca, razgovaraj o problemu i načinima njegovog rješavanja, a ne o ličnosti onoga ko je napravio problem.**
- 13. Vodi računa o tome da kazna nije rješenje za sve probleme i kad se njom koristiš da to bude pedagoški korektno.**
- 14. Ne ispoljavaj ogorčenje i mržnju prema sagovorniku, bez obzira na to što neki postupci ta osjećanja mogu da izazovu.**
- 15. Ne donosi pedagošku dijagnozu na brzinu.**
- 16. Nemoj optuživati, strašiti i ignorisati ličnosti s kojima razgovaraš.**
- 17. Ne nameći svoje mišljenje drugima, već nastoј da oni dođu do najboljeg riešenja na osnovu vlastitog uvjerenja da je učinjeno ispravno opredjeljenje.**
- 18. Više slušaj nego što govorиш – možda ćeš nešto više naučiti (poučiti) i pružiti efikasniju pomoć sagovornicima.**
- 19. U komunikaciji sa sagovornicima nastoј da ispoljiš emocionalnu stabilnost, spokojstvo (mir) i sigurnost.**
- 20. Znanje je ograničeno i mora se stalno povećavati na račun neznanja koje je neograničeno.**

Fondacija Hastor se uistinu može pohvaliti velikim brojem stipendista koji ostvaruju zapažene rezultate na polju obrazovanja i nauke. Međutim, pored toga, tim Fondacije čine mladi ljudi koji doprinose radu Fondacije, unapređujući ga svojim znanjem i vještinama, ali i svojom posvećenošću volonterskom radu u okviru Fondacije. Kao takav mladić, ističe se naš dugogodišnji stipendista Muamer Duratbegović, koji je potpuno zaslужeno ponio titulu stipendiste februara Fondacije Hastor.

Muamer je rođen u Bugojnu, a osnovnu školu je završio u Novom Travniku s ostvarenim odličnim uspjehom, kao i Srednju ekonomsku školu, također, ostvarivši odličan uspjeh. Po završetku ekonomske škole, logičan slijed događaja i naredni korak je bio upisivanje ekonomskog fakulteta. Trenutno pohađa četvrtu godinu Ekonomskog fakulteta Univerziteta u Zenici, na smjeru Računovodstveni i revizijski menadžment. Istiće kako je imao priliku učestovati na državnom takmičenju u srednjoj školi, iz oblasti knjigovodstva. Također, kao jedan od svojih značajnih rezultata, Muamer ističe ostvareno prvo mjesto na univerzitetском takmičenju biznis ideja.

Stipendista Fondacije Hastor je već dvanaest godina. Kaže kako je zahvaljujući volonterskim aktivnostima savladao prezentacijske vještine i suzbio tremu prilikom javnog nastupa. Fondacija Hastor je moja druga porodica, moja velika podrška. Zahvaljujući Fondaciji, dobio sam priliku da se intelektualno uzdižem, da pokažem svoj potencijal i ostvarim svoje životne ciljeve. Život u Bosni i Hercegovini je jako težak, ali mnogo lakši kada imate stalnu i nemjerljivu podršku, koju ja svakodnevno dobijam od Fondacije.

Po završetku dodiplomskog studija, Muamer planira upisati i master studij. Kaže kako gaji velike simpatije prema računovodstvenoj oblasti, te se planira potruditi da u budućnosti postane revizor. Pored toga, jedna od njegovih želja jeste da radi u srednjoj školi, kako bi mogao ostvariti još jedan svoj cilj – prenošenje znanja mlađim naraštajima.

Svoje slobodno vrijeme rado ulaže skupljajući stare novčanice, a trenutno se može pohvaliti zbirkom od preko 300 različitih novčanica.

Svečanom manifestacijom, koja je održana proteklog mjeseca u Zenici, u prisustvu više od 6 000 zaposlenika, Prevent grupacija je zvanično obilježila

# Muamer Duratbegović

dadesetu godišnjicu poslovanja. Stipendisti Fondacije Hastor su uveliko doprinijeli organizaciji samog događaja, ali i svečanom programu. Muamer se našao u grupi stipendista koji su od ranih jutarnjih sati, pa do kraja programa aktivno radili i pomagali organizatorima kako bi organizacija ovog događaja protekla u najboljem redu. Muamer ističe posebno zadovoljstvo i zahvalnost na pruženoj prilici da iskaže svoje mogućnosti i sposobnosti pri organizaciji ovako velikog i važnog događaja.

To je bio veliki izazov, kako za mene, tako i za moje kolege, jer se prije nismo susretali sa sličnim zadacima. Iskustvo koje smo stekli na ovom događaju je dragocjeno. Težak i naporan rad nam se na kraju isplatio, jer smo obavili sve zadane zadatke više nego uspješno. Još jednom smo pokazali da smo mi – Fondacija Hastor – prava ekipa!

Maida Husnić



1. AJLA AGANHODŽIĆ  
(ZENICA)

Studentica je treće godine na Ekonomskom fakultetu Univerziteta u Zenici na odsjeku Računovodstveni i revizijski menadžment. Osnovnu i srednju školu završila je u Zenici. Otkriva kako je još u petom razredu osnovne škole znala da želi biti ekonomista te, stoga, tragom svojih snova upisuje Srednju ekonomsku školu u Zenici, a potom i Ekonomski fakultet.

Proteklih godina sam učestvovala na raznim seminarima, radionicama i konferencijama, ali ništa od toga nije bilo toliko veliko i snažno kao podrška, kao vjetar u leđa dok nisam čula za Fondaciju Hastor. Nakon upoznavanja s radom Fondacije iz iskustva stipendista osjetila sam da je to jedna porodica čiji dio želim biti. Nakon prijave na konkurs i prvog poziva da sam prošla u dalji krug, prošlo je nekoliko neprospavanih noći u želji i isčekivanju važnog događaja u mom životu. Volim raditi sa djecom, volim se družiti, volim učiti nove stvari i još mnoštvo toga što Fondacija Hastor nudi, a sve to ne može ni stati na par listova papira.



**2. IGOR PETKOVIĆ**  
 (SARAJEVO)

Igor je student treće godine Pravnog fakulteta Univerziteta u Sarajevu, posvećen čitanju stručne literature, ali i beletristike. Pored čitanja, slobodno vrijeme posvećuje pisanju i sportskim aktivnostima.

Mislim da sam prvenstveno imao priliku da uđem u uži krug kandidata zbog visokog prosjeka. Na intervjuu sam nastojao iskreno odgovarati na postavljena pitanja o stvarnim pobudama koje su me motivisale da se prvi put prijavim na konkurs ove organizacije. Potrudit ću se da povjerenje opravdam na najbolji mogući način.


**3. NARCISA HADŽAJLIĆ**  
 (KONJIC)

Rođena je u Iranu gdje je živjela do svoje devetnaeste godine. Nakon uspješno položenog generalnog prijemnog ispita Univerziteta u Iranu 2016 godine, Narcisa biva primljena na poznati Tehnološki univerzitet Sharif kao studentica Odsjeka za fiziku. Uprkos ovom velikom uspjehu, Narcisa odlučuje da svoje akademsko obrazovanje ipak nastavi u Bosni i Hercegovini koju smatra svojom domovinom. Danas je studentica druge godine Filozofskog fakulteta Univerziteta u Zenici na Odsjeku za matematiku i informatiku, a prošle godine s ostvarenim prosjekom 9,8 počašćena je i Poveljom dekana.

Profesionalno se bavi slikanjem. Učestvovala je na takmičenjima slikanja i izložbama u Iranu gdje je osvajala nagrade i brojne pohvale.



Slobodno vrijeme uglavnom provodi u čitanju knjiga i naučnih članaka o slikanju. Nekad stvorim neko umjetničko djelo čisto da osvježim misli, a nekad ih radim i po želji drugih ljudi.

Često prati i online predavanja i dokumentarce o astronomiji, matematici i historiji. Posebno voli istraživati historiju drevnih civilizacija i historiju Bosne i Hercegovine.

Kad sam prvi put od kolegice čula za Fondaciju, bila sam presretna što takvo mjesto postoji. Fondacija Hastor za mene predstavlja more pozitivne energije i lijepih priča o uspjesima vrijednih i ambicioznih mladih, koji uporno doprinose svojoj porodici, društvu i domovini. Ja sam se osjećala kao rječica puna nade i pozitivnosti koja traži takvo more.

Mislim da je komisija uvidjela moju ogromnu želju za doprinosom, a i moju komunikativnost. Uživam u produktivnim razgovorima, neopisivo mi bude draga kad čujem priče o uspjesima naše omladine i volim pozitivnu atmosferu koja vlada u Fondaciji. Podrška Fondacije mi najprije predstavlja jaku mrežu talentovanih članova koji su spremni na svaki izazov i za pomoć jedni drugima u bilo kakvoj situaciji. Za njih, odnosno za nas, problemi ne predstavljaju nikakav problem! Oni su staze za ostvarivanje budućih uspjeha. Prema tome, smatram da je prava podrška Fondacije to što se „ja“ pretvara u „mi“. Također, moram pomenuti da je i finansijska podrška Fondacije veoma značajna i olakšava tok studiranja.

**4. LAJLA LEKO**  
 (TRAVNIK)

Lajla je studentica druge godine Fakulteta političkih nauka u Sarajevu. Kao član U.G. "Reunion Novi Travnik" bilježi učešće u organizaciji godišnjih manifestacija, organiziranja humanitarnih akcija te mnogobrojnih kreativnih radionica.

Lajla je, također, bila jedna od učesnika dvogodišnjeg The English Access Microscholarship programa, koji provodi Američki savjet za međunarodno obrazovanje u BiH (American Councils for International Education BiH) uz podršku ambasade SAD-a i Ministarstva vanjskih poslova SAD-a. Program je podrazumijevaо jačanje jezičkih vještina kroz upoznavanje kulture i društva SAD-a, kulturnih razlika, tolerancije i razumijevanja. Istoči i u učešće u regionalnom takmičenju Spelling Bee u Zenici.

Trenirala je karate i košarku, a završila je i Osnovnu muzičku školu u Travniku (klavir). Ima položen A1.1 nivo španskog jezika koji u slobodno vrijeme unapređuje kvalitetnim filmovima i serijama.

Čast mi je što sam odabrana baš ja među stotinama kandidata kao stipendistica Fondacije Hastor.

Smatram da su se moj dosadašnji trud i zalaganje isplatili, te se osjećam nagrađenom što sam dio ove velike porodice koja mi daje vjetar u leđa za budućnost.



**5. ANĐELA MRDA**  
(ISTOČ NO SARAJEVO)

Studentica je druge godine Mašinskog fakulteta Univerziteta u Istočnom Sarajevu. Aktivno se bavi odbojkom, a zahvaljujući velikom zalaganju, kvalifikovala se za poziciju republičkog odbojkaškog sudije, a ističe i članstvo u Udrženju odbojkaških sudijskih Republike Srpske.

Veliku pažnju posvećuje potrebama svoje lokalne zajednice gdje se naročito ističe u ulozi volontera Udrženja roditelja prijevremeno rođene djece „Mrvice“. Slobodno vrijeme provodi s porodicom i prijateljima.

Smatram da je komisija Fondacije Hastor prepoznala moje vrline, humanost, iskrenost, marljivost, vedar duh i spremnost da se zalažem u svim sferama društva. Za mene mnogo znači povjerenje koje mi je Fondacija ukazala i trudiću se da ispunim očekivanja iste.

**6. ESMA BEŠLIJA**  
(ILJAS)

Studentica je treće godine Muzičke akademije Univerziteta u Istočnom Sarajevou, glavni predmet -klavir. Esmin glavni hobi je muzika, te svoje slobodno vrijeme uglavnom posvećuje svom instrumentu, kako svirajući, tako i čitajući određenu literaturu vezanu za umjetnost klavira.

Mislim da je Fondacija Hastor, pored mog maksimalnog truda da održim visok prosjek ocjena na akademiji i širim svoje znanje, prepoznala i moju volju da to znanje, kao i znanje iz drugih oblasti, dijelim sa drugima (tokom volonterskih sastanaka), pomažem i motivišem druge, da svojim vještinama doprinesem svakom događaju u kom je to moguće, priredbi i možda inspirišem nekog da svoj život posveti izučavanju ove ili slične umjetnosti. Za mene je podrška Fondacije Hastor od velikog značaja u svakom smislu – nova motivacija koju dobijam, ne samo da održavam prosjek i uspjehe, nego da težim ka boljem iz dana u dan; tu su i drugi stipendisti koje upoznajem, koji dolaze iz nekih drugih gradova, fakulteta i svaki mjesecni volonterski sastanak smatram novim osvježenjem svakodnevnice.



## OBJEKTIV

**: Radovi stipendistice Zehre Jonuz**<https://www.facebook.com/jonuz.zehra>

**Smajkić Šejla, Zvornik**  
**Medicinski fakultet, Tuzla**

Radionice na kojima sam bila prisutna su upotpunile jedan dio mene, odnosno mog znanja. Svaki put smo mogli naučiti nešto novo, čuti dirljivu priču koja sa sobom nosi razne emocije. Kako sam duži niz godina Vaš stipendista, u sklopu naših mjesечnih druženja nekoliko puta smo pomagali porodicama koje nisu u dobrom materijalnom stanju. Jedan od tih "nekoliko puta" je ostao duboko urezan u mom srcu. Zapravo, radi se o majci i dječaku koji žive sami i koji nemaju nikakvih primanja. Naša volonterka je saznala za tu porodicu i nama, stipendistima, ispričala njihovu životnu priču, nakon koje smo mi pokrenuli humanitarnu akciju. Skupivši dovoljnu količinu novca, nekoliko nas je otišlo do supermarketa, gdje smo kupili osnovne namirnice potrebne za život. Približavajući se kući vidjeli smo da zapravo žive kao u suterenu. Naš dolazak im je izazvao suze, a i osmijeh u isto vrijeme. Sjedili smo sa njima duže vrijeme i razgovarali.

Posebno me dojmila rečenica dječaka koji je rekao: "Aj mama kupili nam i šampon!", za nas tako malo, a za njega tako previše. Drago mi je što sam bila dio ove humanitarne akcije, a ujedno i što sam dio same Fondacije, koja nam je pružila ovakve prilike, da drugima pomognemo kao što ona nama pomaže. Veliko hvala!

Na osnovu baze podataka utvrđeno je da su stipendisti i volonteri Fondacije Hastor u proteklom mjesecu zabilježili 20 034 volonterskih sati. Kao i do sada, najveći broj volonterskih sati ostvaren je na volonterskim sastancima naših stipendista – studenata, srednjoškolaca i osnovaca na 278 volonterskih radionica u 60 općina širom Bosne i Hercegovine. Ovoj velikoj brojci doprinosi i volonterski angažman naših studenata koji volontiraju u administraciji i redakciji Fondacije Hastor, kao i angažman stipendista koji rade na razvoju i održavanju aplikacije Fondacije Hastor i naše web-stranice. Obavezna tema o kojoj su naši stipendisti diskutovali na svojim volonterskim druženjima proteklog mjeseca je **Thinking minds - jesu li ljudi imuni na zamke vlastitog umu?** Pored obavezne teme, stipendisti su obrađivali i druge interesantne teme, a naši studenti su dio volonterskih sati odvojili kako bi pomogli mlađim stipendistima da što bolje savladaju školsko gradivo.

**20 034**

volonterskih  
sati

**278**

volonterskih  
radionica

**60**

općina

**Neke od najzanimljivijih tema:**

- Različitost je bogatstvo
- Vlak života
- Marketing i njegove zamke
- Važnost literature za čovjeka
- Samopouzdanje kao najjače oružje uspješnog čovjeka
- Mogućnost izbora
- Važnost bezbrižnog djetinjstva
- Dan maternjeg jezika – 21. februar
- Imunitet
- Put ka uspjehu
- Kako mediji utječu na nas?
- Elektronsko učenje (E-learning) – koliko o tome znamo i koliko to koristimo?
- Postani najbolja verzija sebe
- Sadašnjost (vrijeme iza nas i spremnost na budućnost)
- Jačanje svijesti i proširenje znanja o raku
- Mnogo znamo, a malo razumijemo
- Historija Bosne i Hercegovine

Općine u kojima su u proteklom mjesecu održane volonterske radionice:



Poštovana Fondacijo,

ovom prilikom želim da Vam se zahvalim na stipendiji koju mi pružate i ispričam Vam kako se odvijalo moje volontiranje tokom raspusta. Svoje volonterske sate proveo sam pomažući starijim i nemoćnim osobama u mom kraju. U toku dvije sedmice, koliko sam imao raspusta u januaru, više puta sam obišao nekoliko starijih nana i pomogao im u pripremi drva za ogrjev.

Ovdje u mojoj blizini (3 km od moje kuće) živi nana Saliha Osmanović. Ona je supruga Rame Osmanovića, čovjeka koji na ratnom snimku doziva svog sina Nermina da se preda. Nana Saliha je izgubila supruga Ramu, sinove Nermina i Edina, te živi sama. Stara je i bolesna, a moji roditelji i ja je svaki drugi dan i kad god smo u prilici posjetimo da joj pomognemo ako joj šta treba.

Tokom raspusta sam je često posjećivao, čistio snijeg oko njene kuće i cijepao drva za potpalu. Ponekad sam joj nosio i pitu koju moja majka napravi, jer ona nije u stanju. Oduvijek se trudim da budem od koristi stariim i slabim, a kada sam saznao da će mi to prihvatiti kao oblik volontiranja, to mi je dodatni podstrek.

Još jednom Vam se zahvaljujem na stipendiji koju ste mi omogućili.

Amer Muminović, Srebrenica